

晚

晴

移

詩

匯

晚晴謠詩匯卷一百十四目錄

湯金釧 三首

姚文田 七首

覺羅桂芳 九首

鮑桂星 九首

吳鼎 八首

程同文 四首

陳壽祺 十二首

梁運昌 三首

李象鵠 三首

李翊 一首

錢枚 二首

許宗彥 八首

郝懿行 五首

昇寅 三首

吳嵩梁 十三首

陳文述 五首

陸繼輅 十二首

崔旭 五首

狄覲光 三首

金衍宗 十二首

嚴可均 五首

趙席珍 二首

楊先鐸 二一首

盛大士 二一首

梅成棟 四一首

陸學欽 二一首

張註我 二一首

彭蕙支 二一首

晚晴彩詩匯卷一百十四

徐世昌

湯金釗字敦甫一字勛茲蕭山人嘉慶己未進士改庶吉士授編修官至吏部尙書協辦大學士重宴鹿鳴加太子太保諡文端有寸心知室集

詩話文端學以治經爲務主敬爲本不沾沾詞章善楷隸自七十五歲後每日晨起鈔經二百字自序存藁云吾詩無足觀奚必存顧一生性情氣象在其中不忍棄也亦俾世遠子孫有所考耳

題禮烈親王克勒馬圖

真人龍飛黑水鄉駕熊馭虎鞭羣羊雄姿偉幹鍾天潢天產神駿佐英王王之躋勇人莫當汗馬百戰先戎行魚皮烏拉葉赫疆大纛奕奕夜生光薩爾滸山吉林岡明兵號二十萬強翦滅此食五日糧馬前所向皆披攘有如駿駁

吞虎狼鼓聲之聲譟雷碾火牛燧象走且僵騰槽躍檻獨
奮揚鼠尾森豎目裂眶橫突鐵騎衝刀槍凌躐厓礪猶康
莊跑土出泉前愈創安平聖水流如漿是真月駟星精房
王騎箕尾歸雲間馬聞躡躅神沮傷絕餐紅粟枵酸腸王
生馬喜逢孫陽王死馬願從秦良嗚呼節烈士不常何乃
馬也思斯滅昔無畫者今畫裝圖成高玉階張陶傳以汪琬
按圖讀傳言能詳身高七尺丈咫長腹毛螺旋耳角芒海
棗之色浮丹蒼黃金鞍鐙紫絲纒屹立紙上猶軒昂自昔
騏驥呈符祥堯候赤文軒飛黃降及漢魏嗟志荒侈陳上
黨飾燉煌昭陵片石摹初唐迄今讀畫珍琳瑯我朝受命
天溥將負圖告期運會昌彪鴻翊衛都一堂人旣殫耿蛟
螭翔物復偶儻風雲驤白山莽莽江泱泱靈氣所蟠不可

量薦之郊廟歌宮商遠邁吉日車攻章

十一月廿二日得煒兄書作此答之

白壁玷青蠅古賢所不免禮義苟無愆人言何足辨捧檄
適荆湖刻苦如兄鮮緩步以當車晚食以當嚮衣屨不敢
鮮杯盤不敢腆猶時寄甘旨遠道孝思展猶日勤筆朴公
餘手書卷似此仕爲貧不媿家積善每念宦途窮清淚有
時泣無何貝錦詞讒人肆流演初聞本不疑三至能無眩
亦以愛之深遂至憂難遣披讀尺素書豁如雪見覲惟媿
儒行篇不信久不見所希曾氏省無則益加勉上奉庭闈
歡下使雲仍顯受毀出求全得福良不淺雲夢吞八九胸

中慎毋褊

夏雨

好雨從東來，翛然滌煩暑。微涼清心魂，憑衿快延佇。古人不可作，開編聊晤語。庭陰綠樹濃，荷露新茶煮。客從田間來，良苗正與與。一夜灌醅醑，千村長禾黍。額手謝天公，今年人四輔。

姚文田字秋農，歸安人。嘉慶己未一甲一名進士，授修撰，官至禮部尚書。諡文僖，有選雅堂集。

詩話：文僖經學小學，致力甚深，立朝建白，皆有體有用。之言時推名臣詩，嫻雅清新，而論古紀事時有獨見。進御應制之作，別自成卷。聖駕東巡，盛京恭謁祖陵，禮成恭紀二百韻，博綜掌故，尤稱煌煌鉅製。

錢塘觀潮

一聲初轉海門雷，萬疊真如雪作堆。盛氣已吞文種墓，餘波猶上子陵臺。底教金寇全師去，合借錢王射手來。欲寫壯觀愁筆弱，銀山飽看只空回。

題盧忠肅公手札

絕野棲遲軍鮮飽淒涼父老貽升棗草履麻衣體攢鏃三
郡遺民同一哭十年萬死不顧身一朝償敗徒酸辛皆言
閹豎喪明社海內未遂空無人奇才偉略世希有南盧北
孫庭傳皆絕倫武陵一出國事去眼見宮闕飛埃塵賢豪生
與時事會天意或教支廢壞卻令宵小更敗之顛倒終難
測茫昧蒿水橋邊戰血流八十日尸猶不收呼天遡卒鞭
且死人理那復幾希留我從史傳攷勳迹卷不能終憤填
膈當時恨無折檻人請殛姦回謝宗祏流傳翰墨奕世珍
書生餘事猶軼羣憂時撫事意慷慨令我淚墮還沾巾吁
嗟天已厭明德倔強孤臣空盡力請看七日降淫霖一死
遺骸求不得

胥江以子胥名心傷東門縣目之言因作長歌陳吳
亡之由於子胥亦不能無譏焉爾

吳通上國始屈巫楚敗柏舉由申胥兩皆復讎非爲國坐
令廟社成邱墟苧蘿山下賣薪女大道宮臺教歌舞當時
自爲沼吳來竟墮術中悲閨主皆言哲婦能傾城豈知召
侮在佳兵伐荆伐越事不已怨構四國來猜爭勞師北征
等狂噬惻款忠言不能制借問先時誰謀遂使鴟張忘
國計懸目東門眾所憐救時無術一身捐蘇臺未見游麋
鹿江水先看化墓田秋風搖落梧宮裏狡兔猶存走狗死
如荼如火空自強烏喙終湔會稽恥

京口守風題甘露寺

岩巖山寺枕江流屋角懸鈴語未休山鬼晝驅虎豹出江

裴夜挾黿鼉游廣陵樹見不可渡瓜步潮生空自愁北望
長安如日遠煙波何處著扁舟

山左道中

滕陽小雨報春耕鄒嶧殘山馬首迎北望海雲含日氣東
來汶水雜冰聲功名不數齊三士節槩終歸魯兩生舊事
難從遺老問路長心急畏郵程

自閩入粵道經泉漳潮惠諸郡感事述懷

眾山磊砢而嵯峨其水激蕩而揚波地靈藏育有奇氣造
物不肯援常科篤生賢喆紛接踵下乃一化爲偏頗我由
泉山向漳浦大儒舊里頻經過當時閩學稱極盛豈祇冠
帶誇鳴珂前李後蔡亦傑出遺意尙欲追鹿洞鵝湖未知
風會變何日鄉里往往尋干戈有如岐封周舊京修矛偕

作秦人歌孫盧繹騷爲眾患波濤出沒隨蛟鼉黃岡迤邐入南粵肩輿盡日臨崇阿譁然赴訴攔道哭體攢瘡痂田無禾前者未歸後者繼令我蒿目呼奈何吾聞朱子在漳州教澤婦女猶漸摩退之守潮纔七月甘棠遺愛何其多文能驅魃竟西徙至誠感格言豈訛安得乘風告天帝早遣壯士傾銀河一洗氛祲布淳化欣欣八極同祥和

癸亥閏二月廿四日夜半由徐聞渡海至瓊州

數年蹤跡來南溟地角天涯無不經蓬萊方丈渺何許挂席直指仙人庭人言海水勢震蕩白日無風走濤浪天樞地軸助迴輳日馭雷車互還往我聞始怖意轉濃眼界一洗江河空平生忠信那可仗或恐駭浪翻蚪龍天空無雲駟星直

海中仰視正當房宿之下

殘月四更如半璧輕舟試踏鼉背行

陽侯深潛颶母息澄波下瞰鮫人宮南極平懸龍伯國世人舉事爭險夷安耶危耶誰獲知千金共守垂堂誠萬里安能破浪馳此行合作紀游冠珊網珠林搜澔汗東坡昔日歎奇絕況我南來非謫宦馬鞍山色入滄茫卻望雷州如故鄉海外一聲雞唱曉早見紅日升扶桑

覺羅桂芳字子佩號香東滿洲旗人嘉慶己未進士改庶吉士授檢討官至吏部侍郎漕運總督贈尙書銜諡文敏有敬儀堂經進詩橐詩存

詩話文敏少從父楚北軍中通籍後直南上兩齋當林清之變進呈恭跋御製文七篇切中時弊受仁宗特達之知擢直樞廷尋授漕督赴粵西按事卒於武昌御製詩深致悼惜詩皆竚興而成雖應制諸作不掩其權奇倜儻之概公初歿尙未上聞曹文正夢其至曰我與君皆理安寺僧今先歸矣先曾爲吳荷屋題湖山秋霽圖云前生我亦到西湖坡老風流今在無秋水平隄山繞郭幾回清夢總模糊後其

弟桂昌觀察浙中乞湯雨生爲繪理
安訪夢圖以紀其事蓋生有自來也

棗陽婦

侵晨過襄陽撲面腥風吼賊去但空村子遺靡雞狗人肉
纏草根狼籍不速朽流亡未敢歸滿地飢烏走猛聞人呻
吟悲酸出破牖馬過啟其門中有垂死婦聽婦哭致辭欲
語氣先嘔噫昔初病時問訊煩姑舅良人意殷勤牀前時
執手一朝聞寇至骨肉分離陡各思全身命棄我如敝帚
誰希盜賊憐不死活亦苟恍惚十餘日水漿未入口所恨
不知飢形氣尙纏糾奮飛苦不能殘生豈持久不願賜良
藥不願分乾糲願污腰間刀游魂瘞荒阜乾坤莽風塵羣
盜恣芟蹂卻愁樂死人喪亂隨時有

烏家叟

驚風匿白日山深路如漆烏店灰燼餘一二破土室老叟
迂客坐欲語神慘慄自言就木年平頭六十一有男已娶
婦菽水歡繞膝更有乳下孫調弄慰衰疾昨日寇突至倉
猝生離別我老骨髓乾欲逃逃不脫長跪乞賊憐股悚甘
喫喝節籛我稻梁顛倒我裋褐一棺久待死斧作薪柴爇
膽裂潛吞聲賊去幸復活近稍集流亡初從亂離說云我
子戀婦十步每九蹶更有襁褓兒呱呱難舍決大半落賊
手殘害爲異物敢望骨肉歡異時聚蓬蓽但願撫其尸一
灑眼中血天明叟出門扶杖尋兒骨

題宋高宗中興瑞應圖

爲貽晉齋作

嘉應祠前遮道哭肅王一去康王獨太清圖籍已飛灰蠟
詔還從髮中讀此時決計果收京進壘澶淵事可成半夜

旌旗應改色一時將帥舊知名大義孤忠不見用十三連
戰真堪痛靈武原同擁戴功赤符翻借丹青重蕭郎畫筆
最稱工祇向涼堂灑墨濃可解狂呼圖鐵象那能痛飲繪
黃龍傷心句踐興亡地花月茫茫天亦醉郡壁纔題誓願
詩學宮已換忘讐字中原狐兔盡何難長弓大箭空據鞍
一鞭快渡誇冰合半臂遙傳任雪寒雲暗舊都不識路黃
袍夢醒浮江去難爲阿母祝碁心苦戀前身射潮處湖山
如畫已模糊粉本偷傳北地無可惜荀香無瑞應空教拾
得中興書

對酒

對酒不能飲尊前喚奈何眼中英物少青史故人多肝膽
向誰瀝江河有逝波身留一劍在中夜手摩挲

塞原極目

曉風忽已肅匹馬塞垣深石亂泉聲咽山多野氣沈邊沙
埋短草秋雨暗長林見獵不能喜漸非年少心

恭和 御製觀海元韻

東海渺無際空濛接九旻層樓吞灝氣大地絕蒼垠浪穩
蛟龍靜航通玉帛陳納川情并効向若軌堪循噓蜃還成
市翔鳥不待晨沙明潮應月苔潤石知春已息陽侯陣誰
扶颶母輪蓬萊真咫尺島嶼一微塵鵬路盤青靄鼇峯聳
碧珣盪空雲鶴影泛棹斗牛津作賦曾工木求丹欲笑秦
披圖書是玉放眼界爲銀鰈獻能懷德鯨輪已化囀邊鋪
霞錦爛面拭鏡光新旋吉依秋節流觀仰帝巡添籌頌黃
屋萬象盡含淳

營夜

月色如霜照滿營終宵鼙鼓雜金鉦人眠枯草寒無寐馬
齧空槽夜有聲諸將運籌紆聖慮四郊多壘恥吾生自看
身手非無用投筆從今學論兵

送吳山尊學士乞養歸里

相逢未放酒杯空十載交深意氣中豪邁君真興不淺疎
狂我亦趣微同當筵頗恕歌兒醉投轄何妨坐客窮一紙
陳情忽歸去扣門告別太恩恩

浦口臨江樓用壁間韻

獨上高樓眼界空茫茫百感忽無窮祥金或恐遺沙外陽
鱗何由入釣中幸已此心盟水白卻愁老眼障紗紅醉翁
門下重傳附可許根因證始終

朱文正師丙午典試江南
詩云根因從此證初終

鮑桂星字雙五一字覺生歙縣人嘉慶己未進士改庶

吉士授編修官至工部侍郎降詹事有覺生詩鈔詠

史詩懷人詩

詩話覺生自云學詩於同里吳澹泉澹泉爲劉海峰高弟其論詩嚴於格凡不入乎格其工者駢文耳其奧者古賦耳其妍者詞耳其快者曲耳其樸直者語錄耳其新穎者小說耳其紆曲委備者公牘與私書耳皆不得謂爲詩覺生篤守師說有一字一句點竄十數過而猶未已金科玉律自有淵源亦見桐城義法之嚴非特散文已也

曉渡漢江

江聲含早秋楚色暗朝雨雙槳入煙中微聞鳬雁語青山
隱樓閣芳草失洲渚遙問漢陽城濛濛在何許

卽事

庭陰雨三樹簷鳥四五聲悠然午夢回緩步巡階行階前

形勝集言頁卷一百一四
一壺酒掃石還獨傾把酒下以書一紙盡一觥不覺夕陽
夕樹影滕上橫山梨脆可飣野莧紅可羹呼兒共脫粟一
飽有餘清

種花

薰風送靈雨一夕燕山綠曉聞賣花聲幽夢不肯續自起
呼買之傾筐饜所欲紛然雜紅紫亦頗娛心目奚奴荷鍤
前一盃蒔一束須臾十數盎鱗次相委屬中庭有喬柯老
碧銜新沐笑比支離叟兒孫繞其足

吾友王秋曹

楷堂

教我種花術其術艱且勤老嬾不暇悉然

以當佩韋古義足可述四時春氣在一語能事畢東菑過
朝雨臺笠破煙出登麥雖已遲插禾未爲失況我鹵莽人
鑒此變氣質吟成種花詩花老猶生筆

懷頻伽

石城衰柳不堪攀君已東歸我未還別後秋風寒楚水愁
來暮雨夢吳關朱弦寂寞陽阿調明鏡蕭條壯士顏雪夜
扁舟曾有約幾時攜酒鳳皇山

阮芸臺夫子屬賦小琅嬛仙館蕉花

桂海移栽近幾年清於簷蔔韻於蓮羚羊挂去春無跡

舊

名羊
角者

野鹿銜來骨亦仙

醉與溪鹿喫
蕉花曹唐句

醒酒風知香近遠護

花鳥識味中邊何當手把金莖露灑向人間徧大千

井陘

萬峰西來不可羈天設岨嶮塞之銘金鑄鐵屹成壁複
道重關紛寘碁古城嵯峨白日晚寒水鳴咽東流悲萆山
木葉颯颯風疑是韓侯張鼓旗

秦郵晚泊

春水初生卅六陂
扁舟晚泊露筋祠
疎煙細雨秦郵路
一樹垂楊出酒旗

得姬傳先生書因寄管異之

來書云近求得武進黃仲則詩讀之固亦有才

然未爲絕出若管生異日所就當或過之

記室賦因皇甫重彥和名藉沈公成爭如管子才難及頓使前賢畏後生

吳鼐字及之號抑庵一號山尊全椒人嘉慶己未進士改庶吉士授編修歷官侍講學士有吳學士集

王德甫曰山尊胸藏二酉力富五丁所作駢體沈博絕麗少爲石君司農激賞而詩才亦以韓孟皮陸爲宗翻險盤空句奇詁重五言長古亦足以推倒一世

詩話朱文正奏御文字脩山尊屬橐故才名早達天聽晚以母老告歸主講揚州書院士論高之詩古體

妥貼排纂才思縱橫近體風格
氣韻未臻高渾不脫館閣之習

甲子秋中過祁陽與譚大尹篋圖 震 同年訂悟溪之

游今來不值作詩寄懷

憶我初過君趨公罷尋幽君爲誇悟溪邀我重來游川途
謝炎景畢役已深秋禮佛登湘山買棹乘湘流風雨靳奇
趣六日及永州蘭橈又百里夾岸徑未搜詰旦笑口開冷
翠窗閒浮艤船陟層坂石梁通蟠繆仰視不見頂墜石欲
打頭中讀中興碑卒篇風颼颼作者與書者其人名山侔
匪獨文字雄忠孝滄桑留頌始勵圖終鏤之告用休山林
廬廟謨兩公非巢由行登亭與臺高曠不可收九疑何茫
茫俾我思悠悠遙知兩公心升高增百憂君門隔浮雲西
望窮雙眸

昨來犯餘暑茲行及深秋旣感日月徂復此山川悠王事
昔方殷歸程今稍留溼霧掩遠巒回風偃近洲遂沿層磴
折直挹孤頂修漫叟舊臺上古今如在眸微雨不能霽況
懼湘江流惟有九疑山恂恂不可收似我素心人有約阻
未酬飛鴻亦何爲雲中聲不休此地踰衡陽得無遠道憂
感物勞我思獨往轉夷猶下山讀豐碑作者久山邱忠孝
耿餘慕匪貴林壑幽寄言崇令名伐柯則可求

題賓谷先生賞雨茅屋圖

仕隱事不同邱壑心自遠芳塵踐已曠故陰別未損高館
抗遙扉虛亭納近嶽密石拒奔轍鳴泉赴平阪羈禽倦屢
棲野鶴飢自飯修竹迎夏長落花感春晚但見微雨生如
逢去子返林合風徐通雲低山半偃銜杯悅寂寥陳詩展

誠懇川途阻洄溯丹青慰偃蹇幽賞誰與言尙友有嵇阮

仲冬南還再過童初吟館次韻

寒翠堆簷樹可因高齋一到一番新林收灝氣雪加肅菊
斷晚香梅導春識客奴厮皆舊雨歸田面目有微塵奇書
互換猶能讀伯生藏初印津逮祕書二本余乞其一許以冊府元龜爲報他日名山待
故人

游鄭邸山林

初識名園路秋光導我行亭虛含石氣徑遼遠車聲花竹
歡相得江湖興忽生流泉何處發噴瀑已縱橫

躡級垂清霽高樓三面開竹陰先客到山色與詩來挂壁
驚雲物臨池想筆才青霄肯將去斜日更徘徊

愜意朝參嬾追歡勢分忘劇談逢酒熱禮射稱弓良坐可

苔痕溼行知菊信涼無人譏落帽坐上許清狂
客說盤山勝相邀蠟屐行胸中千仞在眼底萬端輕好景
吾生負秋容此地清他時邱壑置有夢與將迎

程同文字春廬桐鄉人嘉慶己未進士戶部主事歷官

順天府丞有密齋詩集

卿雲萬態奇峰歌

宋艮嶽石在三座塔同年
朱意園邀作長歌以記之

碧天四幕羣山俯獵獵陰風蒼蘚古一片邊城萬里沙
雲吹落神霄府神霄帝君昔持世四海昇平日無事功業
高垂黨籍碑餘事林泉寫清閼壽山艮嶽真蓬壺成綱花
石東南輪一叢翠竹穿牛領三本黃楊急羽符諸峰括盡
九州秀不但品評皴透瘦官家天縱精六法化出煙巒與
雲岫就中獨立誰第一神應昭功世無右此石當年亦其

亞詔求早被黃封帔萬夫縋取吳越創千里挽供淮汴跨
萼綠華堂小洞天位置深深花木罅臨風縹緲仙袂飛墮
地細縵妙鬢卽卿雲萬態之奇峰矜寵佳名帝所借左元
仙伯玉真妃拂拭雲根定清暇可憐費盡移山手夜半俄
爲大力負作礮難施墨守功揮鞭已劫秦灰走是誰尤物
珍區區北來輦致包氈餽成周石鼓殷玉鉞等是當時勝
國俘悠悠遼水日東注指點金源北京路摩挲遺物識宣
和斜陽下馬行人駐堅牢閱世幻雲煙小劫恩恩六百年
回頭五國城南道石不能言亦黯然

任邱題壁

隱隱雷聲大道車飄飄蜀錦遠山霞荒村橋畔客沽酒高
柳路旁人賣花來往無端同過鳥公私何處問池蛙誰言

白髮能公道只有愁人鬢早華

桐廬道中雜詩

春風吹客又天涯帆轉青山一葉斜日暮愁生江水急荒
亭細雨溼梅花

江邊艇子小於梭雪灑烏蓬白漸多水淺更無魚可網老
漁晝卧抱寒蓑

陳壽祺字恭甫號左海亦號葦仁閩縣人嘉慶己未進
士改庶吉士授編修有絳跼堂詩集

詩話恭甫幼慧成童時已淹貫羣籍嘉慶己未爲朱
文正所識拔與同年武進張皋文全椒吳山尊高郵
王伯申齊名居朝十年著述宏富陳情乞養食物外脩
然雅愛武夷山水晚號隱屏山人疾時不穀食卻醫
藥日燬武夷巖茗啖柑柚少許枕上作絕句云夢想
仙巒二隱屏問天應著少微星人間無此溪山好便
欲乘雲上幔亭意倘恍若有
所會歲星奎宿當有自來

過楓嶺

西行出楓關日腳千嶂午絕磴扶筇輿捫蘿纔一縷崢嶸
大竿頭連峰接數武嶺半露烽墩斥候靜樓櫓海天橫蒼
蒼萬里控一柱地險非人功真宰爲之主凍雲欲釀雪風
力健如弩鳥厲愁飛遲天長覺夢苦青空撐孤亭長劍可
倒拄墜礪隔千尋沿緣不敢俯泉疑湧月流石與隕星古
持此謝越人何必語天姥

秋風詞爲同年宋芷沅洲作

涼颺攪晝堆愁露燕山日瘦天爲黔浮埃十丈塞窮巷閉
門秋老無蟬吟木蓮始開壯士卧匣劍冷入青霜鐔芸華
東屋呼小宋擁膝不得披長襟七年京華守破壁頗苦兩
腳侵風淫習公縱然非病蹇那可按穴無神鍼颼颼薄寒

中肌理霜中傲菊誰能禁先生天骨合變化古黃一出萬
馬瘖並時名姓逐龍尾許我山水聽瑤琴世間蛩螻互憐
愛何況星聚無商參眾仙抗手羣玉府罡風不到蓬萊岑
蘭臺詞客今再見豈復感物嗟蕭森鄖西飛沙穿戰甲英
雄撫髀寒宵深雄耶雌耶忽長笑作賦何足傷秋心玉河
虹影明綠潯城東吹笛紅樓陰黃昏有酒斟復斟開簾招
月來青林

禮烈親王克勒馬歌

烈王骨性真龍種天馬天生佐神勇肝膽如人貌不成但
見丹青髮梢動其脩丈咫高七尺鱗甲生胸角生額國初
駕馭皆英雄蹴踏風雲百靈役烏拉葉赫三韓東王來破
竹成奇功明師五日薩爾澣二十萬眾爲沙蟲此馬所向

一敵萬出入百戰如游龍自跑聖水洗瘡痍夕陽巖液流
淙淙萬里歸來沫流赭錦鞵羅帊華軒下忽聞金鼓誤軍
聲猶想奔虹天際行王生爾生死爾死世上孤忠有如此
可憐人馬兩神奇白山草木呼風起邇來隴漢旌旗殷麤
駢萬騎塵埃間星精何由降太乙元蹕西踣巴夔山大宛
青海厯無草歲貢豈免參驪驪許腕帛齒金門式願鑄騏
驎立九關

南歸途次呈邱丈

如衡

萬里怨芳草拂衣歸卧雲湖山留片石風雨感斯文大阮
殘篇在南陔舊句聞肯教三畝宅松菊愧陶君

夜赴彭城

馬首接明月蒼茫何處村荒山爭亂石微徑走中原天劃

青徐小雲歸梁楚昏時平桴鼓息煙火見彭門

東林寺

下馬綠楊外鐘聲落野亭雲來九江白山入六朝青蓮界
誰開社松枝罷講經惟留虎溪水攪夢到禪扃

南歸述懷呈謝旬男

著作蓬山敢自誣甘馨蘭膳可無娛日邊名士多於鯽江
上歸心不爲鱸乞食天哀陶令拙逐貧鬼笑子雲愚艱難
儻遂閒居賦肯使丹崖綠水汙

永春鄭使君

一崧

論戍秦中傷其老病遠遷歌以永

訣

海天風雪壓孤燈又報南冠入五陵遷客泥塗羞醉尉殘
生鬢髮惜聾丞關河搖筆才難盡貧賤論交感倍增西去

短衣看射虎莫教老淚落行滕

病愈

才命風花不可爭豈堪桂漆斧斤櫻兒童善病李百藥憂
患傷心劉更生解脫莫令存我相衰慵何敢占時名從今
齊視彭殤理豫遣邢卿作墓銘

讀蜀中女史鵲紅題壁詩

劍外兵戈怨翠鈿殘鐙孤驛照沈綿詩情哀過嘯猿淚未
忍多聽蜀國絃

錦水鴛鴦綺翼單風鬟萬里總飄殘青衣江上魂歸夜猶
照我眉古雪寒

歛鮑氏墓圖

墓圖舊剏李西涯今見吳塘百歲碑夜月雲輶山上望秋

墳誰唱鮑家詩

梁運昌字曼叔閩縣人嘉慶己未進士改庶吉士授編

修有秋竹齋詩存

詩話曼叔髫齡能詩通籍後卽賦歸田閉關謝客於醫卜堪輿音律之學多所發明旁通繪事作蘭石楚楚有致嘗與同里梁蒞林過西湖游靈隱甫至冷泉亭恍若有思逡巡不肯入菴林怪問其故曰曩夢游一寺至門鐘鼓大作僧眾譙迎予斥之曰尙有未了事須遲三十年再來今到此宛如夢境故不入其歿歲卒如其言與東坡初至壽星寺事頗相類

仙霞嶺

未及翠微際已驚登頓頻天高甌越小地僻煙霞新修竹不知日老松無意春菴門俯辟窰亭檻入嶙峋山店茶爲市僧廚筍作薪杖聲青玉戛笠影白雲皴勢峻關依險時清戍少人上方聽轉梵暫可息勞塵

懷伯兄北上

迢遞燕臺役行行正未休晚潮富陽火春雪霅溪舟奔走
雙蓬鬢艱難一敝裘惟應訪舊樂十日酒尊留

寄了堂僧

遙知坐夏處花落石壇清講席蜩蟬隨至香臺鹿引行採茶
巖雨足曬衲海雲晴豈念許文度遲公說淨名

李象鵠字侖圃長沙人嘉慶己未進士改庶吉士授編
修有味閒齋遺草

圓明園與李大星白侍直夜宿朝房

環山帶水境清幽金爵觚棱聳上頭樹古直因連上苑月
明知是近中秋五更畫角催天曙萬點寒星入漢流寄與
題詩白太傅盧郎直下有同游

一身

一身人海百難謀
洗馬茫茫未解愁
大地本無臺避債
憂疴常似將防秋
莊生蛺蝶成仙國
卜式牛羊比徹侯
貧病算來猶自得
春風且醉賣春樓

別寓呈坦齋固菴兄弟

安得琴書便灑然
寄螺身世又三年
機雲我借東西屋
韋杜家分尺五天
去日榆槐陰滿地
來時楊柳瘦禁煙
此情可是能追憶
得借清閒話舊緣

李翊號雲華晉甯人嘉慶己未進士改庶吉士歷官御史

湘江舟次

投火依江岸
帆歸極杳冥
五湖秋水白
三楚暮山青
醴酒

銜杯醉江魚入饌腥近無人處宿鷗鷺滿沙汀

錢枚字枚叔又字謝盦仁和人嘉慶己未進士官吏部

主事有齋心草堂詩鈔

詩話枚叔初生時袁簡齋以己名與之簡齋乾隆己未進士後六十年嘉慶己未枚叔成進士簡齋子有詩紀事枚叔和之云交誼通家客接坐甲科前定幸追蹤文章四海推哀淑名譽千秋感顧雍亦科名佳話也

夜至江神廟看月懷焦山覺上人

江神廟前江月寒漢女紅如踏浪還永夜魚龍朝絳節四
天笙鶴響秋山波聲隱隱銀河上雲氣亭亭帳殿間知有
閑僧識清淨未應乘月閉禪關

詠懷堂故址

璧月依然寂寞圓飄零燕子小紅牋君王一唱無愁曲趙

鬼梅蟲盡可憐

許宗彥原名慶宗字積卿號周生德清人嘉慶己未進

士官兵部主事有鑑止水齋集

王蘭泉曰周生博通墳典自經史詩詞而外如小學
算術醫方梵筴靡不涉獵尤深於古文嘗從其尊人
方伯君徧歷滇黔東粵山水之勝瀏覽之作亦多超越

次韻二樵見懷

立盡征雲送遠眸炎方冬日始悲秋吟邊落葉依人住愁
外寒江繞夢流浚谷風期勤攬帶握蘭心事寄登樓試容
尊酒長相見問事應知未肯休

乘月夜行晨至黃洞過峽山已三十里

七年八過清遠峽一度題詩凝碧灣寒月沈江明去棹好
風吹夢繞蒼山舊游記坐談經石古洞誰尋白玉環翠巘

綠煙迴望合靈旗
蠻貊二禺還

中宿峽用少陵集鐵堂峽韻

連峰蔽空來勢阻
江路絕非岨
非崔巍太古立
橫鐵翠重
陰崖肥雲頽
陽岫裂細溜
停空凹皎若
化殘雪
河伯此下
材過客色無
悅峭帆掠懸
巖屢作之字
折飛雨忽灑
人曦
景互明滅
天風颯以寒
盡蠲肝肺熱

大廟峽用少陵寒峽韻

昨暮泊中宿
秋氣感百端
晨入大廟峽
四崖障風寒
日烈
草木瘦路細
行人單
魚龍逼沸
鬱咫尺吹濤
翻奮棹就沙
嘴怖止未敢
餐此生長行
路畏說行路難

湏陽峽用少陵青陽峽韻

綿延太尉山
十峯九不惡
切漢高龍嵒
摩天翠崔錯
森如

佛座巖靈胡不敢削白猿渺孤騰清泉忽雙落屏張九疊
深江轉一帆弱日色覆虛陰煙光斂空漠層巖人徑窮冥
寄傲五岳團團蛟龍宮鬱鬱氣旁薄大造矜神奇太始隱
寥廓俯仰惟生平生理耽寂寞

胥江

胥江潮信斷新漲沒城灣村暗青旗卷沙明白鳥還風聲
多在水雲意欲藏山笑爾浮沈石終年不得閒

漫興

筠蓬小拓露晴光每一峯過翠滿牀風擁亂雲歸遠嶂虹
收斷雨放斜陽江流湛湛青楓暮秋氣蒼蒼白露涼天外
故人相憶否十年蹤跡滯炎方

擬孟東野聞砧

羈人怨夜長，況復聞清砧。急杵擣離思，哀響攢秋心。他鄉各明月，故衣難掩襟。誰能塞兩耳，滿與濁醪斟。

郝懿行字恂九號蘭皋棲霞人嘉慶己未進士官戶部

主事有暉書堂詩鈔

詩話蘭皋通籍後蹕郎署垂三十年專以著述自娛光緒朝游京兆百川進呈所著春秋說略春秋比爾雅義疏山海經箋疏諸書詩亦朴雅無俗韻其配王照圓亦能詩有和鳴集著列女傳及詩問並經進覽潘鄭庵尙書序其集謂休沐之暇日與比肩人發議質難爲笑樂許慎謹案劉炫規過得諸閨閣中尤前古所未有亦儒林佳話也

拾海錯

海邊人謂之趕海

大化何齋淪，泱漭無停止。天地混沌日，滄海何時起。一碧渾涵間，今有太古水。潮汐割昏曉，如斯夫不已。月滿魚腦盈，月晦蚌胎死。漁父攜筠籃，追隨者稚子。逐蝦尋海舌，淘

泥拾鳴觜

海舌即水母蜆形如鳴觜

細不遺蟹奴牽連及魚婢生物供

人用造化意如此鯤鯨在其中芥子須彌耳圓鑒時一望

晉書天文志東海氣如圓鑒

磨青幾萬里

勵志

五日不讀書筋力欲衰老十日不作文心思已枯槁常恐
名不立青春去人早鉛槧無虛陳經訓恣蒐討況偕素心
人疑義相與考偶然窺新境朗若覩清昊孜孜入編記日
久成初藁時余方與婉侗輯詩問敢云希古人亦曰敦宿好

至家

乍遠長安市上塵故園風景喜相親青山有意迎歸客綠
竹居然識主人書味尋時還似舊世情閱處更添新牙籤
未理須吾事且養他年拜獻身

夏日口占

人言三伏暑天長我有閒中逃暑方山氣西來朝帶爽窗
風北過午生涼心清不借甘瓜鎮几靜惟聞古墨香更喜
眠餘湘簟冷蟬聲亂落讀書牀

小園

城市居然似隱淪小園閒涉趣偏真花間徐步不驚鳥竹
裏深藏如避人冒雨尋畦蔬甲娛隨籬插樹土痕新蓬蒿
滿徑荒蕪久芋栗全收復不貧

昇寅馬佳氏字賓旭滿洲旗人嘉慶庚申舉人官至禮
部尙書諡勤直有晉齋詩存

昌平道中

碧落迢迢翠黛橫一邱半壑足關情怪聲山鳥如人語絕

壁晴雲似馬行鄉夢遠隨流水去征鞍晚照落霞明驛樓
紅處輪蹄歇獨坐還須仗步兵

夜雨

薄暮油雲野徑遮飛泉竟夜響簷牙曉來夢斷芭蕉雨開
戶一庭紅蓼花

晚過胡洞壩

天山同望影皤皤千里冰天涉凍河不異歸鴉是行客征
鞍常帶夕陽多

吳嵩梁字子山號蘭雪東鄉人嘉慶庚申舉人由內閣
中書歷官黔西知州有香蘇山館詩集

王德甫曰西江自明以來稱詩者眾而無卓然傑出
號大家者予嘗以語蘭雪今自蔣苕生後二十餘年
蘭雪繼之詩如天風海濤蒼
蒼浪浪足以推倒一世豪傑

詩話蘭雪詩筆縱橫排纂議論藻采足以佐之自編
詩集以詩代序歷述同時袁子才王夢樓洪稚存黃
仲則交相推許次及西江唐宋以來諸詩人辨香所
在惟屬心餘蘭泉所評正如其本意也一時詩名頗
盛朝鮮使者申緯推爲詩佛金魯敬撫其小象以歸
蘭雪六十初度集其國名宿曬酒相祝琉球使者向
邦正肄業國子監時出蘭雪門下後以賀正至乞蘭
雪贈詩爲榮雞林購橐弓衣織詩亦藝林佳話也

書懷

青蘭無冶容託根況幽深和風一以拂揚芬出中林灼灼
桃李顏鬱鬱蓬艾陰亭亭空谷花耿耿持素心芳菲不自
達感氣誰相尋採佩願及時毋令霜露侵
野鶴負標格風塵苦憔悴豈無霄漢心亦爲稻粱累靈鳳
鳴朝陽聲聞託深契方同蓬島游浮雲欲中翳孤心本難
羣鍛羽慚再厲翹首霜天高悠悠聽長唳

禮烈親王克勒馬歌

長白山高江水黑天遣神駒歸貝勒諸將逡巡不敢騎渾
身血汗桃花色頭角嶄然鱗甲動始信天龍有真種生立
功名死報恩畫中見汝猶神勇吉林岡連薩爾滸巨礮驚
雷箭如雨霜蹴奮蹴陣雲飛二十萬兵殲一鼓辛苦身經
百戰場自跑泉水洗金瘡路人今日尋靈蹟一掬春波映
夕陽

烈王勲德史有傳天馬今從畫中見百戰歸來汗血流論
功馬亦當封侯王師破陣如破竹王來騎馬如騎龍四蹏
雷電雙耳風但聞戰鼓先騰空跨山驀礮若平地豈知身
在重圍中箭傷刀斫不能死得意騰驤日千里王歸天上
馬人間矯首蒼雲淚如水功成身殞爲酬恩刻石昭陵未
足論遼海年年千騎出王孫猶問舊龍孫

周定王蘭雪硯翁草溪師屬賦

銘云割紫雲之片石
今漾壁水之元光款

署蘭雪背曰
東書堂寶

周藩宮裏端溪石留與蘇齋試煙墨四百年來壁水香鐫
題古篆看猶識騶虞獻後歸大梁不願移封就洛陽師儒
曾聘劉長史詞賦雅重東書堂鎮平博平皆好士南陵西
亭亦相繼本草圖成爲救荒幽芳千種誰重繪汴河橫決
浪如山迎取金容沒水還一片仙雲依舊紫卻隨玉腕出
人間元朝宮樹傷心碧樂府當初歌不得斜陽秋草十三
陵今日蟾蜍淚重滴未央殘瓦永平磚都與人家作硯田
尋常故物知何限名字關心特可憐

龍泉庵聽泉

寺門亭午殊蕭森龍氣所結雲爲陰不知泉脈出何處潭

水一碧無古今人間苦旱仰神惠山根滴雪成甘露文魚
五色豈靈種我來拊檻觀浮沈竹鞭穿地松插天鱗甲隱
現疑可尋谿風響答萬籟合不雨亦作蒼龍吟此山石奇
樹尤古惜少瀑布飛遙岑寺樓倚山山卧水遂以眾影爲
幽深箏琶平日厭繁會風泉一聽生道心諸天原是空明
相下界誰聞微妙音

顧南雅畫黑龍潭唐梅爲望坡尙書作

崇安縣古傳紅梅清獻手植花仍開滁州老梅尤可敬醉
翁此地曾觴詠唐梅種者知何人俯視宋樹皆耳孫黑龍
潭深不可極前九百載蟠其根繁苞怒坼大於蓋豔雪一
照無黃昏沙壹浣絮荒江濱古木曾現蒼龍身梅乎天矯
亦龍化五朝呵護當有神尙書昔秉中丞節歲豐民和政

無闕懸知此樹卽甘棠爭看穿花飛綵蝶

公舊有螺學士
峯瑞蝶圖

奉使三年還門牆桃李長追攀酒酣爲公縱奇筆萬里春
風迴指間公謂此畫世希有乞君長句君許否要寫平生
鐵石心須憑拄地撐天手野人性僻耽冷花見此肝肺生
杼枻三千萬樹香九里夢踏月明尋釣槎

山陽晚眺

天地蕭森草木黃寒山畫堞半斜陽燒餘鹿下新樵徑雪
後鵬盤古戰場何處笛聲悲向秀昔年琴散絕嵇康英雄
豎子紛紛盡廣武原頭漫激昂

夜登仙鶴峯聞鐘

三十六聲鐘秋山一萬重月明都化水雲氣欲沈松羣籟
此時絕獨游誰與從仙人驂鶴去手把玉芙蓉

雨後

一犁新雨足眾緣共澄鮮野色低涵樹溪流亂入田泥香
鋤菜地風定網魚天更覓幽深處科頭聽石泉

王荊公祠

治術平生薄漢唐致君堯舜豈文章早知紅鶴非吾侶善
用青苗卽社倉憂國心惟天可鑒名山身與世相忘挾書
我愛俞清老驢背從游幾夕陽

過梅嶺謁張文獻公祠

梅銷戰蹟已寒灰翠壁千尋鑿險開蛛網不蒙金鑑錄馬
鬼爭見玉環來少牢遣祭恩徒重秋燕緘詩事可哀薦士
誰知心更苦荔支晚出是奇才

題畫

遙山開晚晴空翠來未已一鳥步斜陽自飲寒江水

陳文述原名文杰字雋甫號雲伯又號退庵錢塘人嘉慶庚申舉人官全椒知縣有碧城仙館詩鈔頤道堂

集秣陵集西泠懷古集仙詠閣詠碧城詩髓

詩話雲伯詩少學梅村游京師與楊蓉裳尤多唱和時有楊陳之目後與族兄曼生同官江南亦稱二陳又同居阮文達浙撫幕府文達改鹽政署廳事館之勝其室曰曼雲閣庭中雙石獅至今猶存雲伯初刊碧城仙館集中年重加刪定爲頤道堂內外集博麗有餘而不免貪多之累外集所編僅香奩一體至二十卷之多亦可見其未能割愛也

南屏弔明兵部尙書張忠烈公

煌言

墓同舍弟壽蘇

作

甲申以後南都亡魯王監國先唐王錢沈兩公已前死孤臣獨有滄洲張公心奉魯兼和唐丹忱耿耿惟高皇頒詔

通使禮所有隆準支派皆天潢魯王兵敗入閩境誰其主
者張名振唐王前死鄭帥驕餽惟修寓公敬公心奉魯
乃和鄭海上聯軍軍勢盛終挾鄭師沂江上一夕烽連京
口鎮上游郡縣紛來歸控扼江楚橫旌旗王師不來鄭不
走孝陵雲樹生光輝豈料師燿挂帆去江督屯兵扼歸路
孤軍無繼士卒散夜走空山倦徒步入險出險歸天台婦
子感泣父老哀桑榆末路思再奮舊時部曲還歸來桂王
立滇名更正監國去號歸同姓鄭師取臺休士卒兩島孤
懸待天命滇中旣陷蛟龍升鄭帥繼死魯亦薨從此孤臣
更無望痛哭天地悲山陵散軍歸去居懸壘海上寒潮共
悲嘯昔爲厓山今首陽古今忠義同憑弔夜深故校潛縛
公從容就義全孤忠門生參軍及舟子感君忠義皆相從

遺詩自愛青山色思葬于墳岳墳側可憐遭際視兩公憑
藉無資心更惻沈公完節金陵城歸骨無地悲同盟錢公
有墓在黃蘗三忠海上垂其名我尋公墓南屏下朱鳥招
魂淚盈把長松風捲怒濤來彷彿雲旗與風馬

阿蘓曲和趙璞函姬隅集中作

東寺花幢梵聲起馬蹏逸矣平章死千秋遺恨泣韶顏一
片清冷橋下水段家九葉擅雄才親爲梁王百戰來已見
紅軍歸蜀道俄聞玉女降秦臺秦臺明月夜當午燭暗雙
花間笑語蒼山嵐暝鬱朝雲洱海波春蒸暮雨雨雲暮暮
復朝朝翠被濃香夢不消甲帳健兒橫鐵篴丁簾侍女按
瑤簫甲帳丁簾行樂地魚腹有人傳錦字鴛鴦獨宿亦無
慘屏帷春雨悲捐棄七星關外認歸程舊侶難忘故劍情

孤坐肉屏聽鐵立果然小別抵三生碧雞金馬無傳箭重
來祇爲新婚戀方幸蛾眉百歲齊誰知雀膽中宵變願共
雙飛返故林夜深苦口說丁甯可憐兒女更番動爭奈英
雄不肯聽來朝聞變驚魂碎黃泉雖誓身難代佛塔煙中
哭鬼雄蠟磯心事真無奈雲片波潏弔影孤雁門夢斷泣
嗚嗚從臣更惜楊洲海靈草難尋押不蘆西師重襲仍難
制呼救空勞走書幣虎子難堪此日言狙公應悔當年計
已卜天心眷建康眼看走死笑梁王菜坪華岫知何處春
草殘基弔夕陽玉案山平險難控花暗銀稜亦如夢南征
望重潁川侯不容故事依唐宋祇有僧奴志不移復仇心
事託題詩至今金齒江山外尙有烏蠻說繡旗

雨夜題彭甘亭周忠武公墓紀事詩後

忠武墓在甯武城外半山

乾隆五十年夏杪霍潦洩旬溪澗泛溢墓爲灰河
水所傾土脈圻裂甘亭尊人方宰斯邑議築隄護
之水猛工不克興一夕雷電交作水所經處忽墳
起一山長三十餘丈高十餘丈蟠屈墓前若隄防
然墓得無恙萬眾歎能咸謂將軍之靈上其事於
中丞某公朋三千金重葺祠宇並勒碑記焉甘亭
集中有詩紀
異因書其後

城頭聲緩統統鼓樓頭響急潺潺雨秋鐙照影讀離騷異
聞如見周忠武忠武當年備虎賁耶襄扼險守荆門同時
功並曹文詔列鎮名齊孫應元尙書師潰全秦變青犢西
來夜傳箭孝寬堅守玉壁城臨淮屢搏中渾戰初陷忻州
繼代州一關甯武據山頭烽煙遠震陽方口礮火頻燔鎮
朔樓笳袖兜鍪集飛矢關門百戰將軍死一家婦女盡英
雄赤燄怒鬱屯雲紫張許餘威勢莫當賊鋒也覺挫踉蹌
重兵尙有三重險諸將甯無半段槍但使憑城肯持久都

城定爲勤王守三關破竹九門開可憐繹絡降書走萬歲
山前野火焚十三陵樹黯愁雲幾時石槨膝嬰墓留得青
山卞壺墳百年宰木都成拱遺民爭說將軍冢故壘荒涼
箭鏃埋荒祠慘澹弓刀動墓前環水接灰河積雨奔騰捲
白波漸見譙山傾石碣幾同灤水嚙前和中夜一峯移突
兀山靈解護將軍骨冠軍冢本象祁連僕射山還摹突厥
始知天意惜忠臣始識風雷別有神重勒穹碑蟠蟲鼠更
開隧道立麒麟墓門有客曾親見傳芭再拜牲醪薦大筆
能傳河岳心高文合補英雄傳重讀謨觴第二碑陰風吹
雨滿靈旗千秋石馬桃花色錦繡夫人別有祠

劉夫人
廟碑

甘亭集中
有忠武配

金陵雜感

往事分明記蔣州江山如畫賦重游坐來士女青綾障換
到仙人紫綺裘春雨闌珊頻對酒夕陽凝望一登樓閒情
消盡歸心動不賦驚鴻賦野鷗

過眼風花春夢婆此情何止感東坡殘山賸水吟難了乳
燕雛鶯嫁已多有客驂鸞閒著錄幾家行馬息鳴珂祇應
賞醉長千里東下江流送逝波

陸繼輅字祁孫一字修平陽湖人嘉慶庚申舉人官貴
溪知縣有崇百藥齋詩集

詩話祁孫文承陽湖宗派兼工駢儷詩詞婉篤深遠
澹而彌永李中耆爲誌墓稱其肆力於詩清溫多風
如其爲人治訓故考訂之學有札記五十餘卷今刻
行者僅十二卷書末附綴沆雜不知編次出誰手也

簡劉泗州 次前韻

芳草閒庭鎮掩門乍看顏色玉同溫文因君賞思傳世病

有人知似受恩酒未臨歧先化淚刀從斷水不留痕故人
五字魂消極盼殺招涼共一尊

得董校理書卻寄

今我不樂思舊游故人衣袂如浮邱夢中髣髴見圖畫曉
日正照銅龍樓樓頭雙成最傷別一雁翩然下天末雛鸞
么鳳飛入雲惜我幽居抱仙骨秋蟲促織禽催耕世間何
物堪虛生玉蚪未奉行雨敕迎風化作雙娉婷一徵璇宮
佐織女一留寒閨宵顧杵莫言縑素不相如萬縷從看兩
心苦鵲尾自短銀河長欲往從之渡無梁珠簾詆蕩開天
闔雲輶間關低復昂巢湖之水秋汪洋倒影飄落湖中央
湖中有鳥名鴛鴦錦翼雖倦成文章待君築室笠澤旁我
持作贅登君堂

爲蔡四昌齡題畫

何人花外叱烏犍珍重江南二月天觸我歸心留不住一犁春雨畫中田

重閱王衛輝蘇詩有感

漫說書生文福齊豈知仍是憶雲泥歡筵淚灑彈箏後病榻心飛落日西楚帳何人當側盾吳江快意試然犀由來枕上游仙近悔共劉郎聽曉雞

愈湜題門三度看從知在郡重孤寒戴頭太尉鋤強易露齒歐陽息謗難此日尙驚詩膽放急裝誰信宦情闌因君并憶吹香閣莊州招余興君相見處折到花南第幾欄

聞雁呈劉眉生廉訪

春風送汝稱歸心怪汝仍流激楚音此去稻梁江上少共

憐歲月客中深天涯舊侶無來信日暮空庭又薄陰見說
神丹河可塞刀圭先擬試黃金

張主簿

宜尊

爲鄧孝廉

顯鶴

作南村耦耕圖

鄧生家貧一畝無奢願欲作耕田夫可憐懷此不得遂道
逢黃犢生嗟吁張生掀髯易易耳我爲卿作耕田圖一人
驅牛肩荷鋤一人側笠相招呼平疇雨過綠如許快意指
點誇膏腴山環水抱露茅屋畫所未及窺徐徐山妻日織
一疋布兒子夜讀百篇書蠶瓶縱橫雜酒甓狸奴跳躍驚
疲驢豈惟幽棲足忘世埋骨亦勝陶家壚君不見浮生幻
境何不有各以意造供嬉娛華嚴樓閣彈指現矧此片壤
誠區區又不見吾家蠹莊風景殊十年讀書空踟躕圭田
已斷先世祿老屋尙屬他人居鄧生與我差賢愚何修便

許游華胥詩成不覺成軒渠送爾刺促登徵車

輯江北藝文志成題後並寄鄧博士

顯鶴

藝文十卷訂初成百感蒼茫赴短檠放眼略消窮士恨驚

心乍見故人名

謂江安甫金履甫劉孟塗汪煥之諸君

剛柔分日摧華髮雅

頌千秋有正聲莫笑書生太晚鎮邀江戴話嚴更

送尙齋太守歸省

病榻聞君來云將別我去君行亦非速我疾苦未愈心學
豈易言人事矧多悟區區方寸地百憂互盤據大聲乍一
驚渙汗忽如注火焚陸渾山城絕堊父布引醉甫成寐入
夢更多怖寡言守今律苦吟悔前誤默然視移陰黯哉起
沈痼

宦成歸故里慈母喜不勝曾聞吏尤俗未覺面可憎爲兒

檢行篋信兒守家聲質業集子弟話舊邀親朋朝眠日三
竿夜坐月半庭榮榮空谷蘭飄飄大海萍何日塵埃中復
此懷抱傾方期壹哀樂雙淚忽已零

知音求不易況乃求知心遇君冠蓋塲蕭然若山林唯諾
習良易直諒意所欽恆言出肺腑片語成規箴十年互相
資交深學亦深因君返初服益自悲塵襟願趁下水船集
此焚巢禽巢禽歸不得且當歸故岑

清時易爲吏無事待興革書生沒世名終當託楮墨洋洋
典謨文煌煌堯禹跡製器不能銘德功亦沈寂君今歸杜
門經訓日有獲我行抗黃塵解悟恐非昔竊譽未可期違
才良自惜儻君假一椽爲君校圖籍

崔旭字曉林號念堂慶雲人嘉慶庚申舉人官蒲縣知

縣有念堂詩鈔

詩話念堂鄉試出張船山房船山北之崔不雕與梅樹君同佐陶臧蘇輯幾輔詩傳臧蘇後采念堂樹君詩合刊之臧蘇序云曉林之詩醇古淡泊味之彌永譬諸精金百鍊寶光內含樹君詩雄古超邁力絕恆蹊而真摯之性時流於楮墨之間可謂燕南之二俊也題爲燕南二俊詩鈔

旅夜

老屋一鐙昏荒山尙有村風寒狸上壁月黑虎蹲門伴坐
惟爐火舒懷仗酒罇醉眠忘路遠歸夢不堪論

過袁家莊舊居

廿載曾居此林塘尙有情釣游思往事去住笑浮生老樹
門多改荒渠草漸平村雞煙舍外猶是昔年聲

秋夜

垂垂鐙燄冷鈴柝促人眠雁叫有霜夜星明無月天青門

逢壯志白社換流年枕畔拋書後雞聲夢著鞭

過船山師故居

此是頻游處重經步爲遲過門非舊主傳世只遺詩恍惚
仙山約悲涼國士知孤寒猶故我忍淚立多時

題梅樹君竹樓編詩圖

我生有癖愛鈔詩殘編敗壁搜無遺沾上梅三更好事口
吟手寫不知疲大張鐵網操選政不但心專氣亦橫編罷
邑人編郡人我如六國遭兼并更畫欲起竹間樓著君編
詩坐上頭牙籤錯落排甲乙清風入戶吟聲幽此樓從君
意中有此編儻傳千載後後人見詩如見樓詩卷長留樓
不朽君不見宋相寇公國號萊官居鼎鼐無樓臺萬事不
如編詩好何日我歌歸去來

狄觀光字筑坪貴筑人嘉慶庚申舉人官宣化知縣有
秋客百詠燕黔詩鈔

三月

雪意作春陰黃雲四望沈關山孤劍氣風雨落花心野色
團荒戍邊聲到素琴燕然宜泐句片石暮煙深

春日赴獨石口作

沙捲黃雲赴朔邊冰開已過好春天地猶殘雪空三月人
與落花又一年村戶舊巢遲燕到關山新草儘駝眠入都
多少閒兒女指點風光笑欲顛

春陰

春陰似人意醉夢兩無著微雨暮闌干海棠開又落
金衍宗字維翰號岱峯秀水人嘉慶庚申舉人官溫州

教授有思貽堂詩集

詩話岱峯爲檜門總憲曾孫以大挑得縣令改教職所至明經講學士論翕然詩妥貼排纂發抒性情不肯苟同風氣年逾八十重宴鹿鳴賦詩徵和冢孫子辰刺史福清舉鄉試已十年通經食報時以爲榮

燕子樓

尙書鎮彭城軍民樂康阜推官辟昌黎文章重山斗李藩
許孟容幕府相左右治法與征謀所賴出眾手惟公能好
賢好賢誠何負後堂列絲竹下陳充箕帚旦夕歸山邱歌
舞屬誰某何圖一蛾眉乃與爭不朽樓居十一年篋衍三
百首偶感舍人詩從容用自剖恐以是累公不然從死久
益令尙書名樂道在人口嗚呼闕誠賢匪直節不苟古者
兒女情義勿取太厚內人皆失聲曠禮執其咎誦闕之所
言識不敬姜後至今一角樓永爲燕子有丈夫志千秋登

斯得無怛白楊祇作薪紅粉孰與壽大義知廢興古墓王

陵母

墓在徐州城西南二里

木瓜

梨一益百損楸一損百益所以古之人投之俾有獲苞苴之禮行豈曰報可責幡幡者惟瓠羹羹者有帛承筐亦幾何要在情不隔能令受者心生死感其德瓊琚於木瓜奚啻過十百敢曰報禮然期以身許國聊比玉之華貢此一心赤

萬物無貴賤見用則皆珍一物適一用致用則在人望梅可蠲渴呼楸能緩筋格物得其理取效疑於神物理有相感何況人心真

宋胡忠簡遺象硯歌和警石

硯爲陽湖呂幼心郡丞榮所藏背有鐫象題曰

澹庵先生小象紹興戊寅
四月朔錢塘馬和之寫

李綱趙鼎棄如遺兩宮北狩無還期不知父兄但知母檜
也和議逢其私惟時詔諭正通使公切忠憤形乎詞想當
草疏硯在側血淚濡墨揮淋漓能如公言斬倫檜同仇大
義敷天知小朝廷甘作臣妾雖蹈東海夫何辭一封朝奏
夕萬里硯亦漂轉天之涯玉堂花飄恍夢寐孤臣九死惟
汝隨公之心腸本鐵石閒情偶賦何瑕疵滄江久卧歲云
晚倔強猶昔霜盈髭侍郎硯背貌公象千秋面目無磷淄
嗚呼老秦旣死姦黨逐曷不賜環徒量移金甌破碎賸一
角六經勒石空昭垂思陵工書善品硯惟於忠佞迷妍媸
雖然薰蕕不同器我於倫也重嗟咨十年五使數往返宛
轉虎口瀕艱危顯仁之返亦其力局中心苦局外訾始拘

繼脅卒乃殉庶與皓弁無差池公時在譴盛酬唱定亦心
折垂涕洟狎邪市井語太激詎料抗節終如斯此如歐公
斥司諫高亦君子非等夷吾儕論世貴平恕因賦公硯兼
及之

晉永嘉甄硯歌

硯左刻永嘉六年施令英作八字吳興菁山土人掘井得之余壻董勤甫

見贈製
爲硯

玉馬出地蒼鷺飛侍中碧血濺龍衣豆田天子更何在銅
駝荆棘埋煙霏永嘉略比唐天祐無主猶承正朔舊中原
鼎沸神州沈一角菁山爲誰守居民曉起爭汲泉轆轤井
眉雙瓶懸銀牀金榦杳莫問昆明劫灰餘此甄銅雀硯材
世所豔字體鍾王況不欠賞奇須待博物才臨平石鼓豐
城劍董郎貽我徑尺瓊墨海聊作良田耕斷紋似具鸚鵡

眼新亭涕淚含晶瑩君不見排牆下有王夷甫運甓陶公亦徒苦笑渠消受石三災何如化作劉伶墳上土

唐景龍觀鐘銘拓本

天堂神宮拜圖冊銅甌金輪置庭室阿師血象高百尋未有淫昏不佞佛斗南一人忠回天鵠翼雙垂幸未折樂章旋奏桑條韋晨牝當陽甘覆轍猖狂但乞二氏靈慧範崇恩並加秩帝后爭營佛寺新觀亦落成景龍日蓮臺瓔珞月雙圓椒殿衣裙雲五色至尊慘繼東宮戕仙佛幾曾裨毫末景雲反正由平王冥助何關法善術金仙玉真穠如華兩兩黃紉改妝抹鑄鐘作銘帝親書楷法猶從八分出銘辭駢儷踵齊梁起草知經誰手筆得無昭容秤量餘鬼蜮風流巧塗澤佛耶仙耶安可誣地獄正爲是人設

周樺舟郡參寄示龍眠策杖圖屬題

我昔策杖雲龍山大河西流奔流灣山人與鶴去不返孤
亭聳立霄漢間邇來廿載困匏繫坐卧四壁林嵐環洞天
福地夾左右時有靈氣通往還前年蠟屐浮玉頂老錢瞿
鑠偕躋攀去秋詩來遽怛化定復采藥棲仙竇洞霄咫尺
快獨往迴風似引離孱顏招游昨喜東道主許吸靈秀砭
疏頑籃輿先度九折嶺屈曲九瑣開雙鑲籊雲上撫天柱
背講堂筑谷荒榛菅洞門束炬賈勇進衫袖翠滴莓苔斑
瓣香流連一菴地想樂吏隱愁時艱夜分月出萬竹杪倦
聽搗藥禽喧喧塵心難滌興盡返老戀雞肋甘嘲訕故人
寄示舊游處龍眠山色浮煙鬟灩澦峰百丈指顧近練潭秋
水鳴琤潺羨君捧檄恣登覽腰腳何慮中年孱青鞵布襪

飯顆瘦健筆欲破詩人慳伯時山莊圖儻在畫手自昔超
荆關文游臺傾石刻杳謫仙誰訪蓉城班紅心驛前幾行
役拂衣仍樂江湖閒留題同感泥雪迹壯觀差勝參軍蠻
揚州懷古和倚吟

形勝江淮控此方蕪城一賦客心傷濫觴自是來岷嶠重
獻緣何號蜀岡忽報瓊花江國豔遂通紅粟汴河長牙樯
錦纜煙消盡贏得雷塘作北邙

將客徐州同人餞別別後寄謝

勸盡離觴賦北征難將潭水抵深情平生汗漫常千里此
日淒涼是獨行曉鳩聲中芳草歇落梅風裏片帆輕故人
儻有書相慰休襲文家賀火名

登黃樓簡繆澄香太守

一角危樓聳霸都登臨風月未全殊
笛聲賓客知誰擅菜色淮徐喜漸蘇
檻外古懷追楚漢尊前鄉夢越江湖何當
策杖雲龍頂俯看河流繞郭趨

夢從軍作

據鞍草檄禿千毫萬帳無聲北斗高
請爲將軍窺敵壘雪中躍馬夜橫刀

梅溪以吳門崇真宮宋徽宗賜道士項舉之詔墨刻
屬題

上清寶籙乞長生弓劍誰攀五國城
一詔輪臺終自悔至今人頌武皇明

嚴可均字景文號鐵橋烏程人嘉慶庚申舉人官建德
教諭有鐵橋漫藁

詩話鐵橋精於考據著書等身詩文爲其餘事其弟章福言伯兄詩不徇時好文從數萬卷故書中鉤索得來誠篤論也

楊周二子墓下作寄懷王山人 啟

侵晨攜斗酒流眺城南隅碧波帶長麓寒光清有餘羣鴉一以噪纍纍多邱墟念彼地下人生前良我徒楊子雕龍手周生野鶴如飄飄兩詞客長伴孫太初流行隨大化一去無賢愚寥寥四五子後死爾與余感此一相酌沈吟立斯須

邯鄲行

于役太行東茫茫弔全趙柳外波濤漳水聲雲中車馬邯鄲道邯鄲俠客少年場疇昔豪華不可當鬪雞走馬香塵下執戟鳴珂玉殿旁趙王宮闕青冥裏平原第宅連雲起

雕闌十百倚華妝上客三千躡珠履鳴鐘撼瑟夜沈沈倒
海移山意氣深一笑還酬雙白璧片言立取萬黃金龍蛇
交戰風塵黑合從分符馳九國華屋談兵虎豹韜清霜放
馬金銀磧已聞大將叩闕中更起長城橫代北一朝事去
等飛埃富貴雄豪不再來春風苔繡廉頗甲夜月樵歌主
父臺食客游魂鳥獸散銳卒千羣鬼火戰朽札虛稱天帝
觴耕夫屢拾長平箭沈吟往事總堪嗟戰地風沙落日斜
照眉池竭膳脂水講武壇開白骨花花開花落漳河口邯
鄲女兒勸客酒醉歌一曲邯鄲行道上行人盡回首

舟行贛江半月度彭蠡望見匡廬作

泚泚湖漢水我行多滯淫忽見廬山面遐思洞壑深斷虹
收宿雨飛瀑界秋林擊節自高詠匡君知此心

寄星嶠

蜀道青天萬里行
棧花峽草聽猿聲
鄉心寄與峨眉雪
應作春流過石城

觴洲

扁舟盡日對清虛
行過觴洲畫不如
江水西流月東出
照人殘夢落嘉魚

趙席珍字響泉
晚號蜨叟
合肥人
嘉慶庚申舉人
官旌德教諭
有寥天一室詩集

倚闌有思

雲腳陰陰欲暮天
倚闌何事意纏綿
最憐芒屨穿空翠
無復茶香灑午煙
紅豆已生微雨後
綠牋猶帖小窗前
丁甯記取歸來路
月在新秋第一圓

花朝攜酒游惺梓山示侍者

又見梨花月二分
風光老送杜司勳
他年與汝逃禪去
一鉢清泉一笠雲

楊先鐸字聲父一字木庵湘陰人嘉慶庚申舉人官桃源教諭有醒齋詩草

適情

豈不居湫隘游心太古還
世情看落葉詩境在秋山
坐約松陰護行隨鶴影閒
紅塵車馬迹不到白雲關

春盡

豔陽天氣近黃昏
芳草萋萋綠到門
雛燕習飛殘雨徑乳
鳩歸哺夕陽村風吹柳絮黏衣桁
蝶抱桐花落酒樽
獨坐芸窗誰是伴
坐看新竹倚雲根

盛大士字子履號逸雲又號蘭畦道人鎮洋人嘉慶庚申舉人官山陽教諭有蘊懷閣詩集

顧南雅侍讀畫蘭歌

湘江帝子彈瑤瑟恍惚神游眾香國畫手東吳擅顧雍妙
寫蘭心與蘭質仙姿亭亭俗豔空有意無意天然工眞珠
簾卷玉鉤墮千花一笑羞羣紅嫩芽細撥銀鈎小麝墨螺
煙自縈繞映帶爭看取勢妍縱橫會得忘言巧翻思昨夜
醉停樽露臺獨立吟黃昏翩其僊袂御風去花氣爲我留
詩魂畫蘭人本蘭臺史品格幽蘭足相擬滇池草色綠
蕪遠駕星輶采芳芷秋江夢君水一方碧城杳靄雲蒼茫
嫣然花容隔香霧愛而不見心旁皇燕臺高吟夕陽暮閒
情別有滄洲趣君還翰墨興飛騰我已容華迴非故惠我

清風拂素牋，蘅皋幽思倩。君傳好與美人攀，作佩墨華如醉潑湘煙。

梅成棟字樹君，號吟齋，天津人。嘉慶庚申舉人，官永平。

訓導有樹君詩鈔

詩話：樹君與崔曉林同出張船山之門。公車十三上不第，與朋好就查蓮坡、水西莊舊址立梅花詩社。選津門詩鈔，又佐陶鳧菴選畿輔詩傳。

津門詩鈔輯成題以長句

鼠囓蟬穿二百年，搜求遺草出塵煙。題名不必登科錄，小傳如標獨行篇。前輩有靈來紙上，舊交無數晤燈前。寒窗料理閒中業，聊結枌榆翰墨緣。

敢云此卷少遺珠，聞見非多愧小儒。略爲詩人傳梗概，忍令古本盡荒蕪。海濱耆宿傷存歿，沽上風流半有無。漫道

漁洋常感舊詞壇振臂望同扶

答崔時林孝廉見寄

天末飛來一卷詩開緘正值菊香時
名心未冷情何遠苦語能工境可知
沽上煙花三月別棣城風雨十年思
崔羣兄弟今坡賴好待同來話玉卮

入秋以來先後得崔念堂湯菊人來書賦詩答之

黃葉敲門霜繞廬西風吹到故人書
一年離緒秋尤苦四海知交老漸疎
貧對青山空入畫別添華髮又盈梳
不緣良友相垂念誰向榆關問索居

陸學欽字子若太倉人嘉慶庚申舉人有蘊真居詩集

李香君小象

一腔恨血歎桃花點染生綃妙筆誇爲問
元規塵十丈攜

將此扇可能遮

丰姿寒玉自棱棱
阮老田郎喚不謾
笑殺孟津王學士
烏絲細楷寫春鐙

張註我字我經號
舸園昆明人
嘉慶庚申舉人有雪笠
山房贖橐

載酒訪海淀莽半峯

未遂還山計聊攜問字樽
舟穿巖下石犬吠水邊村
密竹斜通路深花半掩
門幾年濠上意舍此復誰論

訪正照上人

幾年傷遠別今日訪吾師
入谷聞鐘早穿林到寺遲
燕巢新構殿雲護舊編籬
采藥歸應晚瓶花落硯池

彭蕙支字田橋丹棱人
嘉慶庚申舉人

棧行

峻阪嚴關氣象尊崎嶇已歷幾朝昏鳥音迎客通鄉語山
勢隨人入店門倚劍只堪防暴客銜杯且復覓吟魂更聽
僕輩圍鑪坐又說前途萬竈屯

晚晴移詩匯卷一百十四終